

000000

- राष्ट्रपति द्रौपदी मुर्मू विद्यार्थियों ने आला दर्जा रा नैतिक मूल्यां ने व्यवहार अर काम करण रा तरीका रो हिस्सा बनावण सारु कह्यो।
- सरकार प्रधानमंत्री इंटरनशिप योजना रा पायलट प्रोजेक्ट री सरुआत कीनी।
- मिंदरां अर घरां मांय घट स्थापना सागे आज नौरता सरु व्ह्या।
- प्रदेश मांय घणखर ठोड़ां चौमासा री बिरखा बंद व्ह्या पाछे केई जिला मांय पारो चढ्यो।

000000

राष्ट्रपति द्रौपदी मुर्मू विद्यार्थियों ने जीवन मांय नैतिक मूल्यां सागे आगे बढ़बा री सीख दीनी है। वे आज उदयपुर मांय मोहनलाल सुखाड़िया विश्वविद्यालय रा 32 वां दीक्षांत समारोह मांय बोल रही ही। राष्ट्रपति दो दिन रा दौरा सारु राजस्थान पधारी है। राष्ट्रपति विद्यार्थियों ऊं मेवाड़ रा इतिहास री जाणकारी करण बाबत् कह्यो ताकि वां ने गौरवशाली रीति-रिवाज री जाणकारी मिल सके। राष्ट्रपति कह्यो के विद्यार्थियों ने चरित्र खराब करण वाळो कोई काम नी करणो चाहिजे। वे कह्यो के आला दर्जा रा नैतिक मूल्य वां रा व्यवहार अर काम करण रा तरीका रा हिस्सा व्हेवणा चाहिजे। राष्ट्रपति कह्यो के बाबा साहेब भीमराव अंबेडकर रो ई मानणो हो के चरित्र भणई ऊं बत्तो खास व्हे है। वे कह्यो के जिंदगी रा हर पहलू मांय ईमानदारी व्हेवणी चाहिजे। राष्ट्रपति कह्यो के 21वीं सदी रा दौर मांय ज्ञान, विज्ञान अर प्रौद्योगिकी समेत हर हलका मांय तेजी ऊं बदलाव व्हे रह्या है। राष्ट्रपति कह्यो के ऐड़ा बगत मांय वां ने भणई-लिखाई री उपयोगिता बणायी राखण सारु विद्यार्थी भावना ने बणायी राखण री जरूरत है। वे विद्यार्थियों ऊं खुद री लगातार आगे बढबा री इच्छा अर सामाजिक संवेदनशीलता बीचे संतुलन बणा र आगे बढ़बा बाबत् ई कह्यो।

000000

राष्ट्रपति कह्यो के भारत साल 2047 ताई विकसित देश बणणो तैय कीनो है, जो नौजवान पीढ़ी रा योगदान ऊं ही हासिल कर्यो जा सके है। श्रीमती मुर्मू समाज रा हर हलका मां महिलावां री कामयाबी माथे खुशी जताता थकां कह्यो के आ देश अर समाज सारु माथो ऊंचो करण री बात है। राष्ट्रपति अब्बल रेहवण वाळा विद्यार्थियों ने सोना रा तमगा दे र नवाजा। कार्यक्रम मांय राज्यपाल हरिभाउ बागड़े कह्यो के विद्यार्थियों ने वां रा ज्ञान ने देश रा विकास अर समृद्धि मांय काम लेवणी चाहिजे। ई मौके पंजाब रा राज्यपाल गुलाब चंद कटारिया अर प्रदेश रा उप मुख्यमंत्री प्रेम चंद बैरवा ई मौजूद हा। राष्ट्रपति आज सिंज्यां सिरोही जिला रा आबू रोड़ पधारी। वां रो काल वटे पौधा रोपण रो कार्यक्रम है। ई पाछे शान्तिवन मांय वां रो वैश्विक शिखर सम्मेलन मांय सिरकत करण रो कार्यक्रम है। राष्ट्रपति रो बांसवाड़ा जिला मांय मानगढ़ धाम रो दौरा करण रो ई कार्यक्रम है, जटे वे राज्य सरकार री ओर ऊं राख्या जावण वाळा आदि गौरव सम्मान समारोह मांय सिरकत करेला। म्हाणा बांसवाड़ा खबरनवीस बतायो के राष्ट्रपति रा दौरा ने ध्यान राखता थकां हिफाजत रा करड़ा इंतजामात करी ज्या है।

000000

सरकार प्रधानमंत्री इंटरनशिप योजना रा पायलट प्रोजेक्ट री आज सरुआत कर दीनी। वित्त मंत्री निर्मला सीतारामन केंद्रीय बजट मांय इण रो ऐलाण कीनो हो। इण रो मकसद पांच साल मांय देश री आला पांच सौ कंपनियों मांय एक करोड़ नौजवानां ने सिखावण रा मौका मुहैया करावणो है। कॉर्पोरेट कार्य मंत्रालय रे मुजब सरकार ई सारु आठ सौ करोड़ रुपया राख्या है। वित्त मंत्री कह्यो के सरकार मौजूदा माली साल मांय सवा लाख लोगां ने सिखावण देवणो तय कीनो है। आ योजना ऑनलाइन पोर्टल पी एम इंटरनशिप डॉट एम सी ए डॉट जी ओ वी डॉट आई एन रे मार्फत चलायी जावेला। 21 ऊं 24 साल ताई री उम्र रा उम्मीदवार ई महीना री 12 ऊं 25 तारीख ताई ई पोर्टल माथे अर्जी दे सके है। वां ने बारह महीना ताई सिखावण दी जावेला। सिखावण लेवण वाळां ने हर महीना पांच हजार रुपया री मदद दी जावेला। ई रे अलावा कॉर्पोरेट

कार्य मंत्रालय सिखावण लेवण वाळा हर नौजवान ने छह हजार रुपया री एक मुश्त मदद ई देवेला।

000000

प्रधानमंत्री नरेन्द्र मोदी री अगुवाई वाळी केन्द्र सरकार रा तीजा कार्यकाल रा पहला एक सौ दिन मांय करी ज्या खास कामां री जाणकारी देवण सारु आकाशवाणी जयपुर रा प्रादेशिक समाचार बुलेटिनां मांय खास श्रृंखला चलायी जा रही है।

000000

मिंदरां अर घरां मांय घट स्थापना सागे नौरता आज धार्मिक उमाव ऊं सरु व्ह्या। ई रा तैत नौ दिन ताई मां दुर्गा रा नौ रूपां री पूजा-अर्चना करी जावेला। आज शैलपुत्री स्वरूप री अराधना करी जा रही है। ई मौके मिंदरां ने खासतरीका ऊं सजायी ज्या है। जयपुर रा आमेर, दुर्गापुरा, झालाना डूंगरी अर राजा पार्क समेत दुर्गा माता रा न्यारा-न्यारा मिंदरां मांय जातरुआं सारु खास व्यवस्था करी ज्यी है। आमेर रा शिला माता मिंदर मांय आज मेळो सरु व्ह्यो। 13 अक्टूबर ताई भरण वाळा मेळा ने ध्यान राखता थकां प्रशासन आवण-जावण रा खास इंतजामात कीना है। जैसलमेर जिला मांय पाकिस्तान ऊं लाग्योडी सरहद कने तनोट माता रा मिंदर मांय ई सोहवणी सजावट करी ज्यी है। न्यारी-न्यारी ठौड़ां ऊं जातरु माता रा दर्शन सारु पूग रह्या है। सीकर जिला रा जीण माता मिंदर मांय ई आज घट स्थापना सागे जीण माता रो खास श्रंगार करी ज्यो है। वठे आज जीण माता रो मेळो ई सरु व्ह्यो। सवाईमाधोपुर जिला रा चौथ का बरवाड़ा मिंदर मांय ई खास धार्मिक अनुष्ठान कर्या जा रह्या है। हनुमानगढ़ टाउन रा भद्रकाली मिंदर अर पल्लू रा ब्रह्माणी मिंदर मांय ई मेळा भर रह्या है। पाली रा जोगमाया मिंदर मांय फूलां ऊं सोहवणी सजावट करी ज्यी है। डूंगरपुर अर बालोतरा रा न्यारा-न्यारा दुर्गा मिंदरां मांय ई माता रा जयकारा गूंज रह्या है। करौली जिला रा कैलादेवी मांय ई आज मेळो सरु व्ह्यो जिण मांय राजस्थान समेत आरे-सारे रा राज्यां ऊं जातरु पूग रह्या है। प्रदेश मांय न्यारी-न्यारी ठौड़ां आज रामलीला ई सरु व्ही। कोटा मांय नामी दशहरा मेळा रो उद्घाटन लोकसभा अध्यक्ष ओम बिरला करेला। संवारे री पोर आशापुरा माता री विधि-विधान सागे पूजा-अर्चना करी ज्यी। अजमेर मांय जवाहर रंगमंच माथे ई रामलीला रो दरसाव कर्यो जावेला। चूरु मांय कलश यात्रा निकाळी ज्यी अर जूना दुर्गा शक्ति मिन्दर मांय जातरु मां दुर्गा री खास आरती कीनी। सिरोही जिला रा देवी मिंदरां मांय खास धार्मिक आयोजन राख्या जा रह्या है। मोड़ी सिंज्यां न्यारी-न्यारी ठौड़ां गरबा महोत्सव ई राख्या जावेला। झालावाड जिला मांय राता देवी, दुधाखेडी अर मिश्रौली रा माता जी रा मिंदरां मांय मोटी तादाद मांय जातरु पूग रह्या है। आज आं तीन ई ठौड़ां नौरता रा मेळा ई सरु व्ह्या। जिला मांय न्यारी-न्यारी ठौड़ां गरबा रा कार्यक्रम ई राख्या जा रह्या है। म्हाणा चित्तौडगढ़ खबरनवीस बतायो के नौरता रा पैला ई दिन मिंदरां मांय मोटी तादाद मांय जातरु पूग्या। किला माथे रा कालिका मिंदर रे बाहर आधी रात ऊं ई जातरुआं री लेणा लागण लाग्यी।

000000

प्रदेश मांय घणखर ठौड़ां ई चौमासा री बिरखा बंद व्ह्या पाछे अब पारो ओजू चढ़बा लाग्यो है। कटे-कटे तापमान 40 डिग्री सैल्सियस कने पूग ग्यो। मौसम केंद्र जयपुर रे मुजब हाल ई प्रदेश मांय चौमासा री बिरखा पूरी बंद नी व्ही है। केंद्र रा वैज्ञानिकां रे मुजब आवता दो दिन मांय ओजू बिरखा व्हेवण रा आसार है अर कटे-कटे छांटो- छिड़को या हल्की बिरखा व्हेवण री संभावना है। ई बीचे जल संसाधन विभाग रे मुजब प्रदेश रा न्यारा-न्यारा बंधां मांय बूता रो 87 दशमलव 43 फीसदी पाणी आ ग्यो है। बांसवाड़ा संभाग रा बंधां मांय 97 दशमलव 89 फीसदी, कोटा संभाग रा बंधां मांय 94 दशमलव 11 फीसदी, जयपुर संभाग रा बंधा मांय 80 दशमलव 94 फीसदी, जोधपुर संभाग रा बंधा मांय 73 दशमलव 53 फीसदी अर उदयपुर संभाग रा बंधा मांय हाल ताई 72 दशमलव 88 फीसदी अर पाणी भर ग्यो है। चौमासा री ई रूत मांय हाल ताई 406 बंधा पूरा भर ग्या है।

000000